

溫州府 湖 公 館

出山草譜卷六

續編

重建開化縣署記

以下在開化任作

黃彙湯肇熙紹卿著



開化縣署之續建自同治四年冬迄七年夏落成先是咸豐八年春粵逆竄華埠前令陽湖湯君彥聲偕劉明府福林同戰歿逆遂入城燬各署殆盡歷年官斯土者假天香書院爲辦公所以賊蹤出沒不遑修萬安梁君彝齋甫下車倡其議董事者爲邑衿徐寶森姚學純張榜魁汪文翰吾輝汪嗣鰲等餘不備舉皆能勤勞始終厥事其費領公款四千緡復合三十六都捐助猶不足梁君自捐千三

百緡計共用錢萬二千緡有奇其基址多仍舊并丞捕二署及監獄倉庫之類計二百四十餘間規模宏敞視昔有加云上杭傅君吉棠梁幕賓也僑居於開余壬申捧檄來復延助理事皆親之爲余詳述且以記請余曰君非開產何亟亟於是傅君曰余懼梁君之實心行事久而就湮爾嗟乎天下事豈不存乎其人哉卽如署者官之傳舍也凡官此者或四三年或一二年甚或不及期年以不能久於其職也因陋補苴若一切與我漠不相涉皆此傳舍之心也夫卽此傳舍其署之心可知傳舍其官之心烏在尙有實心以行實政耶而梁君且以戎馬倥傯戶口逃亡之後

物力艱難政令草創而能興此大工俾民無怨讟固由開之紳民急公尙義而君之賢能可知矣余不佞後君承乏者四年幸居其安而享其逸也日坐堂皇勉於所事何敢以爲傳舍愧吾梁君獨惜梁君居僅逾月余亦居僅期年前後以憂解職是卽無傳舍其官之心而斯署仍一傳舍可慨已記之俾後之人知廢興之由且見傅君重交誼不以久暫聚散易其心云

捐置開化縣天香書院膏火記

歲壬申八月余下車芹陽旣循例觀風集生童而月課之公餘評騭文藝不啻師若友之相得也邑有鐘峯天香兩

書院鐘峯宇隘不能爲肄業居天香較閱厥乾隆間邑人戴世偉所捐建并助義田若干以有桂數株故名然百餘年來父老傳聞惟賢有司或講學於此以乏貲未能延專師而勤考校也職員杜逢源兄弟聞余志續置膏火捐田百七十畝會教諭任君官變卸事余重其品學請之大憲留數月周歷各鄉復勸捐田及銀計值數千緡顧開地瘠雖樂從事而非得萬緡權予母而出入之不可垂久余方慮合尖之難謀所以補捐之不足癸酉浙闈奉調分校迄竣返任遽丁外艱時署篆爲陽湖呂君懋榮毅然身任其成以余因公未得速歸徇邑人請留權主講卽於今年二

月甄錄開課其一切章程也官紳商權盡善勒之石其籌增經費也以茶爲開產酌取釐捐旣稟請復以張明經榜魁等牘陳中丞楊公行乃定余於茶捐一節輒慨然於羊傳不如意事十居八九之言也而呂君實心行事堅忍爲不可及云是舉也開人士皆稱善然綜三十六都好義之家聞風而起實自杜氏倡之非杜氏之捐余不能志此志呂君亦不能志余志也杜氏其與戴氏後先並美已今余將歸呂君亦移他宰瀕行有記大旨爲生徒勛學而事之原委屬余另記之余於是不能無望於董事諸賢也進而告之曰天下盛衰廢興之故豈不存乎名與實哉今各直

省郡縣無不有書院而求實效則十不獲一卽戴氏捐建之初亦豈惟事虛名哉乃自乾嘉迄今而已經理不詳何人田畝不聞何地歲入租僅值百緡亦不稔何費假又數十百年安知不并是區區之租而無之也語云善始善終願諸賢勉善其終毋使後之人慨名存實亡以書院爲餼羊焉可也至於守土之官鮮不以樂育人才爲務者固非獨不佞與呂君之有同志條規具在踵而行之復得官師振而作之祛意見慎更張戒瞻徇絕流弊則書院之澤及長矣

天香書院課藝序

予一風塵吏茲事廢久尙能與諸生論文哉顧自童年領鄉舉迄通籍供職農曹碌碌半生雖學殖荒落未嘗不見獵心喜或率爾操觚工拙所不計蓋結習未忘故也同治壬申以乞外宰開化下車采風亟思振作士氣旣月集生童而校之復爲天香書院籌肄業資癸酉以憂去官署篆陽湖呂君向叔與邑人留予權主講席期以朔望課時文另加課古學每披閱間有點竄呂君因慙息擇文之較可者付手民以示勸計得百若干首都爲一帙而綴言於簡端夫自

國家以制義取士歷二百餘年海內偉人由科目出者何可

勝數浙尤稱才藪雖以開僻處偏隅而山川靈秀鬱久必
宣風氣變遷無往不復他日聲明文物必有爲一邑光者
諸生其勉之予拭目俟之矣雖然書院爲造才之地而時
文者特士人進身之梯徑也唐裴相有言士先器職而後
文藝往予謁今中丞楊公示以諸生當讀有用之書務爲
有用之學其屬望拳拳三致意焉夫人亦自顧樹立何如
耳諸生志其遠者大者思所以不負所學不負在上者之
期望則區區時文固猶其末焉者也開邑密邇新安昔新
安嘗講學於此當時如汪程諸公人才輩出而有宋科目
亦極盛士習端斯文風益振其明效固彰彰者詩曰高山

仰止景行行止予願諸生殷嚮往之心也夫

續刻天香書院課藝跋

客有過五都之市入百珍之肆見夫珉剝陸離其色黝黝
其光油油目眩心駭知其寶而莫名其器也問於肆主人
主人曰若者爲癸父鼎若者爲己子彝若者爲周壺若者
爲漢洗其餘犧尊雲壘之屬一一鑒別無遺客曰嘻是何
以知而得此也主人曰吾業之烏乎不知之又烏乎不得
之且吾鼎彝壺洗之屬其初大抵多湮沒於塵沙榛莽中
未有過而問也吾物色之而於是拂拭之摩挲之若者價
值什伯若者價值千萬若者價且無算吾將待而沽焉客

聞益舌橋不能下將信將疑而遂去今夫書院亦學者之肆也邑有書院邑之人才所匯萃也其爲寶多多矣開邑天香書院余以甲戌權主講刻課藝哀然成帙今年秋余復從里居來數課之以覘進境並擇藝若干首付續刻事竣客謁余曰曩常過五都之市入百珍之肆問於主人而知彝鼎壺洗之屬之以古而貴也竊聞論文亦然文非古不傳卽傳亦不久今長者爲是懃懃無已意其文皆可傳歟其傳皆有當於古歟予曰嘻豈謂是哉今夫鼎彝壺洗之屬非徒以其古也必其有金玉之質中廟堂之用耳目所不經見庸衆所不易知是以難得而可貴也若第曰古

耳則將周之一木一石漢之一瓦一磚而亦曰價且什伯千萬至於無算歟則將以鼎彝壺洗置之周以下漢以前其時未爲古而遂未爲貴歟則將以今之鼎也彝也壺與洗也而必冒其名爲周物爲漢製遂以爲古遂以爲貴歟夫物無古今以有可貴故貴之文亦無古今以有可傳故傳之今之文不及於古者特風氣使然耳而豈謂文非古不可傳哉世之文有貌爲古者非真古也艱深之文必曰古而奧餽釘之文必曰古而博淺易之文必曰古而淡而司文衡者厭棄尋常數墨徒工揣摩乃高其格以求其古驚其貌而信其古此所謂鼠腊名璞魚目混珠也且文亦

非不必古而今之人才又非必獨拙於古也記曰玉不琢不成器昌黎韓子曰患業之不精不患有司之不明地雖僻壤豈無靈秀之姿不施琢雕直苦窳而已人雖良材非卽巖廊之器不加精進亦康瓠而已操觚之士以榮世不外時文以壽世則時文亦古文天下後世多哲匠宗工焉有入寶山而空回者哉吾知其鼎彝壺洗吾文者必其能什伯千萬無算而價值吾文者矣則書院之有造大矣客旣得吾說謝曰下邑舛陋恐不足酬長者之望也而客意亦仍將信將疑而遂去

署浙江開化縣知縣湯君彥聲殉難記事

軍興以來海內州縣守土之臣或以無餉無兵力不能與賊抗勢猶可爲後圖於是大吏旣律以失陷之罪旋錄其克復之功朝上彈章夕登薦牘因是轉博取顯爵高官者蓋亦車載斗量莫可勝數矣然事固有幸不幸人生功名節義結局豈偶然哉同治壬申八月余捧檄來開下車例謁各廟城內花山之趾有曰湯公祠詢之悉其殉難巔末余與君同姓鄉舉同年先後又同官於斯哀君之志思亟表章會丁憂解職受代者陽湖呂君懋榮其邑人也爲覓得家傳示余遂撫大意記之俾異日志乘資采擇君諱世銓號彥聲高曾祖以上並仕父建中官山東運河同知君

隨侍年二十九以大興籍中道光丙午科北闈再試禮部
報罷運河君卒奉母歸是時金陵陷常州邇賊氛避亂徙
居鄉摒擋入貲咸豐七年三月以知縣分發來浙九月委
署開化十月視事縣界江西之玉山德興安徽之休甯婺
源爲浙上游門戶防浙宜防衢防衢尤宜防開先五年春
賊自常山竄入掠華埠去故於開置重戍而金衢巖道繆
公梓檄邑衿戴敦行並於大濟嶺歇嶺大鱗嶺馬金嶺濟
嶺壕嶺建六關城設守焉至於饒紉撤戍留華埠者僅三
百人八年春賊渠石達開犯浙衢之總兵饒廷選敗績於
玉山大南橋繆觀察邀之守常山草坪驛不可徑返衢城

賊尾之遂分撲開化警至城內民勇潰幕丁亦紛紛遁君
乘夜獨巡行城外已而還登城望東南火光自遠漸近日
出歸署甫傳餐有紳以事急告遽擁之出時三月望日也
至二十六都遣人約各都民團殺賊並飛書請益兵會賊
自浦城來破江山圍衢州且分股由遂昌陷處州疆吏雖
調兵四援而開化常山已隔賊外勢不及賊攻衢三閱月
繆觀察力守卒解圍去而官軍乘勝復武康武義縉雲遂
下處州君時亦率民團搜剿餘賊以六月初六日復縣城
初八日遊擊夏寶慶至捕華埠餘賊境內肅清君任事四
周月而城亡締造及三月而城乃復又以地方增兵善後

援兵過境之供彈丸瘠區百方羅掘其險阻艱難如此既
望吏議革職代者久不來初失守時徐方伯檄候補知縣
李某署事逗遛會垣六月賊退始抵衢旋又聞警君以印
印其衣畢授家人資郡付李則堅不受道府憲迫之赴任
亦不應而兵勇留境惟劉君福林五百人梁君某千人二
十三日賊自常山七都竄華埠我軍進擊屢敗之二十
六日賊大至以力薄與抗少卻君檄戴敦行飛借婺勇其
本邑團勇撥守城仍分率來華埠助劉梁二君戰戰三日
三捷會貴州定遠協副將朱貴統三千人至言各營辛苦
且少休詰朝我當前隊衆皆喜二十九日黎明軍中鼓起

朱拔隊行渡河賊從東岸山紛紛抄出前望方驚疑劉君
詫謂君曰敗矣朱協戎殆危矣亟令進賊遽擁壓地隘不
能陣劉君躍馬陷而殞君亦分兩隊進及地名箬皮塢遂
陣亡年四十有一兵勇斃者二百餘人賊知城守嚴竟不
敢犯八月朔從白沙關走婺源於戰所覓得屍衣印衣者
胸腹脇膀中刃傷各一面如生義勇方忠死於側越日得
棺乃殮焉方忠本衙役素無賴以君嘗有恩感甚出入必
親隨是日遠望見賊窘君亟趨前以身扞翼之刃交下不
少避聞其死猶兩手與抱不解云賊已竄婺戴敦行借得
婺勇取道捲橋與賊遇擊之斃其目僞表天侯餘四散以

防回竄故勇遂駐油溪口而各關巡察嚴自後賊無敢一
覬覦衢之得終晏然者皆以君籌防力也嗚呼而豈獨百
里之寄不負守土云哉特惜君邁數奇以節義終不得以
功名顯此則其視常人而獨不幸者顧究何嘗不幸哉
論曰是役也議者以君有急於見功之心而速得禍夫君
處不得已惟竭力求濟至禍福死生固早度外置之不待
印衣時有成算也特親老子幼人情當此爲實難耳然惟
無稍計及君所以能一死身雖死而境卒保全豈與徒死
塞責者比哉聞君歿後家貧艱度日妻賢淑不忍告其母
者數年母趙恭人頻頻問曰吾三寶何如三寶者君乳名

也妻輒託書詞以應嗚呼可傷也已君以胡恕堂中丞奏
請復原官從優卹而開士民馨香之報兼及劉君且以方
忠旁禱夫人無論何若皆可與聖賢豪傑同歸忠之忠於
君其亦猶君之忠於國歟

開化縣江右真君祠重修勸捐序

開於吾江右爲鄰壤江右人之寄處於開者或以商或以
藝或以耕種或以播遷其年久者田園廬墓故舊婚姻與
土著無異散於東南西北四鄉其在城者亦數十家城舊
有鄉祠祀許真君歲時釀金張燈作劇笑言酒食非特答
神庥亦以聯鄉誼也余壬申下車肅謁見榱桷殘剝其右

旁廳牆壁未備詢之司事者知乏公產歲入不足供香火
前令吉州梁君雖議集捐訖未就爲愀然思復倡之越明
年遽以憂解職會因事羈開司事者以鳩工告且云是役
也需費數百緡請得一言爲樂輸勸余諾之而不禁怦怦
有感也昔吾真君一旌陽令耳而於吾鄉有大功德千百
年猶尸而祝之余遭時竊祿捧檄來開於開之人與吾鄉
人之在開者皆未有毫髮之功德以相及余慙然其作神
羞無可與鄉之人言也且昔之日鄉之人皆父母余今則
余亦江右民耳曾何言之足重然自余來開余非有私於
鄉之人而鄉之人無不樂余之官於斯及余解職又若惜

余之不獲久官於斯是何鄉之人之情也夫官猶傳舍今
日於此明日不知何適鄉之人之居於斯也其常也不可
以年計也鄉之人之崇祀於真君也亦其常也不可以年
計余願鄉之人安所樂生相保聚於斯爲善良於斯長徼
福於吾真君而真君之享祀亦綿綿延延於無旣詩曰維
桑與梓必恭敬止此則余恭敬之意願與鄉人共者若夫
脩葺是宮固不待余言勸也是爲序

遊南雁蕩山記 以下在平陽任作

雁蕩山有二一在樂清者曰北雁在平陽者曰南雁夢溪筆
談謂南雁較北雁先得名而士大夫往來題詠則惟北雁

稱盛若南雁殊寂寂焉意名其同而實則異歟前郡守枝江張公風雅好遊嘗言二山實相伯仲竊以余爲南雁主譬如室有傾視而不自知也家有名士而不自聞也簿書鞅掌屢欲一至不果今年十一月與平陽副將梁君靜藩循例會哨橋墩門旣畢事約減從迂道行行三十里皆有山山皆土非石或土石混及地名鬧村倦眼筍輿中遙見一峯插天表若揖迎人又見樓閣在虛無縹緲間不知誰氏所宅詢之則雁山是矣遂沿澗進約數里舍輿山下蓋山夾澗東西從澗西步而上徑曲仄輒數武一息氣喘汗流僕左右翼將及巔有道士出謁始知卽土人稱仙姑洞

者是洞之外四望皆有石石不霑土道士引入憩乎洞側之樓房時已鐙上余笑謂梁君曰甚矣憊樂哉遊乎梁君曰仙姑相傳爲朱氏女著靈異遊者宿多祈夢吾與子旣同官必同夢乃安斯寢以永今夕何如於是呼行廚具酌酌已而醉醉已而設榻抵足余終夜不成寐寒風颯颯吹窗紙有聲未知鼾睡者時果夢焉否也天旣白驟雨過披衣急起視昨日山峯皆無有相與驚嘆梁君曰天道未可測安知冥冥者不使昭昭卽靈之託於斯而恍然示以夢耶余臆之而心終不敢信竊效昌黎禱嶽故事日將午陰霾盡霽千怪萬奇軒豁呈露傭於道士有瞽者請導以遊

問之則曰居此久山之徑途出入與吾足不差累黍山之
形狀佈置若圖畫之懸吾心也遂觀透天洞卽月牖是從
洞口蛇行而出猱而升惴惴匍匐而返有井名仙姑浸其
孟泉雖旱不涸瞽者曰此山脈流通處緣石磴斜行又有
田螺洞有擔水洞掬飲皆甘冽仰視石梁橫空似非飛仙
無能到者折而左旋觀西天門壁立萬仞訇然中開俯瞰
輒膽戰欲墜瞽者曰此卽雲關爲澗西山最奇境下有清
風洞再下有錦屏洞厯厯指視與梁君笠杖相後先復至
昨舍輿處越澗而東過照膽潭潭多紅紫小石攜數枚歸
亦袖中有雁山矣拾級登入貞士洞卽朝陽洞是曲折三

進穿洞而出有華表矗如柱旁連一峯若門戶然余謂梁
君此與西天門屹相向宜名東天門稍上有平地數十弓
意卽考亭題額會文書院故址先賢流韻令人興景行之
思焉乃埽石坐取志圖諸峯名以證多不能合瞽者指以
告余曰此上頭尙有觀音洞鳥道崎嶇可毋往其峯則若
者爲三台爲蝙蝠爲玉女爲老人其澗西仙姑洞之上亦
有洞曰畚斗洞其峯則若者爲會仙爲童子童子遙與玉
女對俗呼玉女爲觀音故曰童子拜觀音其後又有龜峯
其盡處一峯曰金雞回頭峯合澗東西數十峯此特舉大
概問以所謂明王峯頂龍雁所居則如海上神山可望而

不可卽矣噫造物之工巧扶輿之靈異至茲山殆不可思議哉乃遣瞽者偕梁君下山輿從已戒塗不復至仙姑洞辭道士遲遲行蒼翠中一峯一回顧移步換形又各妙肖最後一石塏勢若疊成出谷口有潭深碧以竹筏渡過逾里許仰首見奇石如仙人對奕狀不知更有何洞天亦不及盡搜窅奧怱怱而歸而梁君屬以記余思夫茲山之名雁蕩特由樂清附會焉而別之以南北耳各自爲山各自爲名山山亦何必以名竊哉然猶曰名與實符平之南何必非卽樂之北而獨異夫平人又以錢倉之山名南雁彼磊磊皆頑石且遠如風馬牛不相及而輾轉附會天下事

多務名失實如此或曰是亦有故焉讀侯一元雁山供億之議樂之病於雁也久矣而雁在平者獨僻甚而雁在平之錢倉者尤陋甚僻且陋此山之善自韜晦亦平之遠慮深思也吁是說也吾並存之以質諸後有遊南雁者

勸捐平陽北港鄉會文書院膏火田敘

余自壬午捧檄來平今已兩稔公暇輒喜爲諸生評隲課藝先是惟邑龍湖書院月有考課今則握槩生徒鼓舞從事若以余於此道猶更事之智胥識塗之老馬也於是萬全鄉則有逢源書院南港鄉則有吾南書院江南鄉則有親仁社學咸欲以文就正課與龍湖埒噫嘻盛矣興文育

才平邑其庶幾乎雖然余猶不能無餘望也今邑之中都鄙廣而戶口稠者莫如北港一鄉其鄉向未有書院以距城較遠而就龍湖課者亦寥寥焉余嘗攷之邑志有南雁山會文書院者相傳爲紫陽題額蓋卽宋時陳貴一貴敘二先生讀書處數百年來流韻未沫而荆榛荒墜良可惜也會北港周康甫上舍來見因以爲言宜就故址構數楹旣可光先賢且以裨後學乃不數月而康甫來告落成首其事者爲陳氏族裔及康甫諸人余聞而不禁喜曰昔陳氏二先生從紫陽遊自是浙人始知有洛學夫理學之名厯劫不刊而其教澤足以感發百世後之人心承學之士

使皆知有二先生而遠取法焉則所謂興文育才者當更有進而昔小鄒魯之稱可復見已康甫曰書院爲諸生肄業所非有膏火貲曷由鼓勵膏火非有田曷謀經久余避之因倡助廉俸而敘於簡以爲其鄉人勸

重建平陽會文書院記

宋儒陳貴一先生爲晦翁友讀書南雁蕩山相傳晦翁過訪題會文書院額今則樵牧之場惟燕麥鳧葵動搖春風爾余嘗至瑞安仙巖寺有晦翁書溪山第一四字蒼古秀勁可愛夫書爲游藝之一小焉者也而古人手澤猶珍惜若此況古人之學之大者乎書院所以講學學所以明道

出山草譜 卷六
講所以育材當時永嘉之學自陳先生兄弟從遊伊洛起及賢豪輩出極盛稱爲海濱小鄒魯嗟乎師儒之教今昔隆替之不同毋亦有關運會者乎余守土官責任興文下車之初徵攷志乘以會文書院先正遺蹟不可荒也屬北港鄉人士闢草萊而新之規模雖僅數楹可資藏息且其鄉多醵金助田俾束脩膏火有賴余復月課而鼓勵之因樂記緣起亦以示學者知所宗焉董是役者某某例得備書

平陽縣新建文明塔記

平陽舊無塔也距城南二里夾嶼山之淨明寺俗名塔下

寺相傳有塔建自炎宋乾道元年圯於

國朝乾隆二年而志乘闕無攷光緒壬午春余捧檄宰茲土甫下車紳耆來謁述人才之盛昔稱小鄒魯科第不振迄今數百年堪輿家謂宜以塔鎮之第因其工鉅議輒中止聞侯所涖首興文教敢以請先是海上將用兵輯費爲海防已而事平邑富人輸者多未納余爲催收抵用不足復廣勸助陳雲樓學博端正負鄉望特肩其任以是年四月經始閱甲申三月而功竣命之曰文明塔此物此志也塔七級高十餘丈皆磚爲之周圍六丈有奇垣厚六尺中可梯以升其附近築室三楹祀文昌旁寮擇土人居守爲置

田若干畝俾有租食刊兩碑一以註輸金姓氏一以記事而邑人丐余秉筆焉或疑浮圖惟佛氏崇尚今邑之廢墜待舉者多矣何亟亟是余曰不然天下自行省至郡縣有塔者十居八九豈皆經營於不急之務哉形家立說雖若渺茫而易言俯察地理離爲南方之卦南主文明是以聽政者皆位離明而南嚮若科目尤取象文明今塔形如筆且位城南異日人文之盛理必有確然不謬者且凡塔多建於都會都會者人心之標準也而塔則又都會之標準也法制禁令之所出風氣好尚之所趨無一不託始都會人或於數里數十里之外望都會而未見之望塔焉而已

如見之矣過宗廟則思敬過墟墓則思哀過都會則忠愛之誠奉公守法之念油然而生而勃然動矣塔豈作無益之比哉竊以爲關繫於士風民俗者莫若此是役也用錢八千緡有奇金鄉殷君鵬飛以千緡倡襄事者某某皆與有力焉銘曰

夾嶼之山勢如連珠屹屹有塔轟彼山隅五雲長護萬靈衆扶對龍蹲而卓爾斯文其在茲乎

重建平陽南港鄉吾南書院記

平陽南港之吾南書院落成其鄉人士以記請而詳述其顛末曰昔三十六都橋墩門石橋長數十丈上有屋屋以

杉木架乾隆三十年洪漲橋圯木泛至水頭不散居民爭欲取適李長春至亟止之謂宋代鵝峯書院成南港人文遂盛遺址卽松山之文昌嶼是也今木遠流不散或天其有意斯文乎於是就水頭之古營基石佛亭旁構書院顏曰南和時西隱寺僧行不善有田八十二畝前宰何公以充入書院資膏火諭李長春等董之三十二年鄉人還寺田二十畝更南和額曰吾南延師主講絃誦彬彬焉然而地低洳且迭患水迄乾隆五十七年遂爲颶風所壞李長春歿董事張振禮以力難復舊請將田租付橋墩之司橋事者前宰李公謂學校重於津梁改入縣城龍湖書院蓋

廢墜莫舉近百年矣光緒八年我侯至士林咸喁喁仰培育里人許元達首其謀集林聘珍等六人醵金重建度地於靈溪街後凡兩進左右廊屋共十八間用錢千數百緡元達僅中人產助錢百餘緡鳩工庀材獨任其勞而公而忘私一切自損累勿計也其基址六畝有奇其形勢後倚玉蒼之燕頭山前面鹿角峯靈溪水環腰如帶其左有池右毗濟嬰公所其神祀文昌其經費則請於我侯撥還龍湖書院田六十二畝五岱山義學歲由官給脩金六十緡侯移其半爲獎賞資餘則鄉人之助田捐金者修埵合尖猶有待也蓋大概實如此余進而告之曰天下事成與敗

豈不存乎人哉語曰有志者事竟成吾南書院自成而敗復自敗而成其成也其志也雖然猶有成此成書院之志者則又在人各求其志之成也昔范文正公爲秀才卽以天下爲已任杜子美身處窮愁而欲大庇天下寒士二公之志何如夫人事功名業鉅細精粗各視其所居之境地而要未有不自立志始者吾於志書院之成嘉今之許元達猶昔之李長春也吾望人成其成書院之志則人文復盛今之吾南且如見宋之鵝峯矣因次第所述而記之其董事六人某某備書以勸來者

重脩平陽縣十七都陡門記

昔劉定公過河洛而思禹之明德夫定公距禹千有餘載猶嘆慕焉若此後世疏一渠則曰某公渠築一堤則曰某公堤稱其姓以志不忘豈非德之及人深而利賴者遠哉平陽東南鄉農田皆恃有水利以濱海故水利皆設陡門外拒潮汐內蓄溪流宣洩因時旱澇可無患也余自壬午下車聞邑父老言乾隆間前令漳州何蓉林先生多惠政過錢倉見道旁有祠祠有像馨香之報百年如一日讀碣文知當時小南一鄉凡建陡門者五其在錢倉則東垵陡門爲總匯所而石山巖陡門次之顧東垵納瑞安聖井及北港鶴喉嶺諸水其陡門上有白水灘金莊灘下有大王

殿匯淤泥沙石日積壅滯大雨激湍屢壞屢脩迨歲丙戌七月既望遂漲塌無遺鄉人牒請復建余親履勘令移上數武基址乃固檄各鄉衿耆以十月農畢用民之力五旬而工竣費錢千數百緡計應輸之田凡二萬畝遠近別三等畝輸錢二百一百及七十有差首其議者某某董其事者某某羣策羣力用有節而庀材堅於是僉請余爲之記余記焉而係以銘其辭曰昔有賢宰勤施德隆平人嘖嘖曰蓉林公一鄉五閭派別流通東洋要隘勢若喉嚨桑田滄海淫雨烈風物無不改恃在人工余媿能鮮曷惠顛蒙乃屬耆老協力和衷乃告子弟趨事赴功運斤雷動荷畝

雲從天墜斯設衆流所宗砥平矢直上有駕虹舊物之復衆謀之同傳之百禩食利靡窮綏我士女熙熙雍雍以生以育人壽年豐

續脩開化縣志序

同治壬申余宰開化時東南肅清兩浙晏然無事中丞楊公卽今閩浙制軍將脩全省通志檄下先脩郡縣志余惟開化舊志已八十餘載是誠宜亟亟欲身任之而旋以奉諱解職不果泊在平陽任聞開化官紳復議斯舉躍然喜以爲昔之志焉未逮者今幸觀厥成也雖然志之脩豈苟焉已哉一邑之紀綱法度聲明文物及一切風土人情皆

於是乎在志者志其治一邑之事脩志者亦求其治一邑之道耳夫開化界浙上游土民與客民雜處其人嗇而樸其氣擾而馴治之易爲功而不求所以治之則亦未必終無害余於開化媿無善政嘗以爲可慮者有二事居民山谷多種苞蘆泥土下壅溪流淤塞後將不免水患此舊志言及之理勢所必至也奸民以持齋拜經煽誘漁利久且至於滋亂余曩因查保甲始知其黨蔓延幾徧爲虺弗摧爲蛇若何此舊志所未及亦從前風氣所未有也夫常情狃於苟安而患氣生於積漸治民者思慮與民相終始而精神遠及於數十百年之後鑑得失究利弊莫善於志如

考水利則思何以籌久安閱風俗則思何以弭邪慝志之有裨於治固章章也脩豈苟焉已哉獨是治民者司牧之責而邑有賢士大夫則助理尤易易焉開化自宋時人才輩出科名極盛後雖不競迄

國朝戴簡恪公猶以文采照曜一時今則鬱蓄久矣天道數十年一變余於開化脩志之成旣畧述所以爲治諗後之官斯土者而猶願鳳麟之祥乘時而出星雲之瑞先睹爲快則尤足增邑志光矣竊跂以待之遂樂爲序之

出山草譜卷七 附詩

同治壬申四月初旬將赴官浙中留別都門同人六首

無端風雨悵歌驪酒綠燈紅有所思髀肉已生徒感我血
腔猶熱待酬誰江湖後夢觚稜遠書劍新裝款段遲別意
請將流水看出山仍似在山時

如許頭顱鏡影中光陰彈指太匆匆鳴雞星曉曾聽鼓走
馬風塵又轉蓬 壬戌以大挑
需次畿垣 五斗無多陶令米一官復得

楚人已茫茫宦海身如寄爪印依稀踏雪鴻

春官回記聽臚傳容與曹司又十年 自癸亥通籍供職
農曹今始乞外 我

輩鯽魚原措大人間雞犬那神仙名山敢作千秋想薄宦
聊隨百里緣到處現身堪說法升沉何必問蒼天

一醉差同值告身眉頭容我幾時伸蛟龍未化池中物蟣
蝨原爲下界臣宦職似名新令尹江山曾屬古詩人回看
臺省多儕輩睽隔雲泥分敢親

年來慣作送窮文可有嶙峋骨幾分裘敝黑貂無長物衣
成蒼狗自浮雲非關勾漏求爲令待把杭州說與君聞道
瘡痍猶未復敢忘憂樂此心厓

銓宰開化其地屢經
兵燹多流亡失業

管領湖山亦壯觀囊琴錄待著驂鸞還因捧檄忻遊子豈
爲多錢愛好官他日奉揚期報政故人珍重願加餐天涯

望處長安遠且盡平原劇飲歡

各贈和章錄存

益陽譚定澍聖泉

房星煜煜走織驪慷慨風前萬里思好水好山應有主公
才公望定輪誰時當天寶詩多感夢入蓬壺覺已遲記取
生平期許在清如水玉直如絲

臺上黃金氣似虹相逢青眼孰英雄瓊樓玉宇高寒處越
水吳山感慨中君去已成秋後燕我來殊類北飛鴻蘆溝
日暮重回首楊柳千條怨晚風

五雲高處聽臚傳三百人中亦少年十載乞歸虛祿養九

關重到媿顏仙秋風車馬燕臺客夜雨江湖澤國天如許
頭顱成底事送君南望一淒然

月娥星姊鎮相親珍重飛瓊再嫁身向道清虛惟碧落可
知辛苦是紅塵和光溷俗非吾事畧分憐才有幾人莫似
淮南之帝所居然長揖不稱臣

百戰初銷粵海氛東南民力盡耕耘湖山再造須循吏蘇
白重來見使君雞犬桑麻都待理龍蛇荆棘若爲分十年
臥領司農籍定有深謀策治勳

蕭蕭琴鶴壓征鞦流水無心任一官紅藕花中思遠道碧
雲天末望長安殷勤種竹招雛鳳窈窕吹簫倚彩鸞君倘

不忘河朔飲尺書時惠故人看

德化 歐陽雲 石甫

新詩高唱比探驪振觸羈人遠道思循吏傳容經術有登
科錄更少年誰水緣行地流膏易雲到爲霖出岫遲廿七
韶光駒隙過策名猶憶晤君時丙午同榜君年最少是時
晤君章門今二十七年矣
那有驂騮伏櫪中郎官寄跡亦恩恩膠舟勢阻坳堂水勸
駕心飛馬首蓬重試琢磨知利器好憑張弛認良弓浙中
望歲君應念聞說哀鳴集澤鴻

詩書世業一經傳難得高堂尙盛年鳩杖路旁迎衆父板
輿花下擁遊仙春華秋實隨時運北馬南船總夙緣莫怪

十年貞女字信天原許力回天

君以壬戌大挑需次畿垣癸亥入農曹今又乞外

堪笑男兒七尺身不經蠖屈那容伸
看空大海魚龍戲閱徧中朝柱石臣
匡濟若為經世畧安危還仗讀書人
年來畫省應回憶薄宦都從冷處親

俗吏區區抱具文不應巧拙箇中分
零星黑白迷棋局頃刻青紅變海雲
廿載為郎真悞我十年以長更輸君
閒曹媿鮮涓埃補上考何如撫字廛

舊遊湖上憶奇觀恰好乘潮駐玉鸞
我輩設施徵道術部民驚喜得

朝官礪仍新發工遊刃味到甘回記
勸餐東過太邛賢令尹

故人曾否念追歡

謂嘉興大令陳訂堂同年

臨川劉卓棧懌平

翹首征途騁四驪深情款款耐人思
陽春一曲高難和汗簡千秋事屬誰
我識荊州欣未晚民歌叔度恐來遲
此行好建匡時畧漫說杭州異昔時
十載迴翔粉署中改官捧檄轉匆匆
絜羞念切陔南草促駕心隨陌上蓬
磨琢自然成利器弛張方許試良弓
稽山鏡水經行處第一關心肅羽鴻

歷代循良史册傳殫心撫字迓豐年
能圓功德官真佛得鎮湖山吏亦仙
豈為功名留治譜要將香火證前緣
他時

種就堤邊柳合配東坡與樂天

男兒詎是等閒身莫向名場論屈伸下邑絃歌徵道學

盛朝黼黻重儒臣無忘憂樂同斯世克任安危匪異人浙水

最多賢合尹芝蘭氣味定相親

賤子顛蒙媿不文胸中涇渭畧能分通家幸得攀元禮奇

字還思問子雲可有津梁資後學總期圭臬奉神君心香

一瓣殷勤藝鐘鼎山林念並厪

靈鷲峯頭記昔觀樓臺棲鳳塔翔鸞滄桑變後思陳迹宅

堵安時仗宰官虎到古田應盡徙古田山在開化縣西鶴山中虎不噬蛇不螫

餘清俸合分餐政閒倘躡遊山屐願寄新詩慰舊歡

德化 劉瑞祺 謹承

三載游蹤記唱驪余戊辰假旋己巳來京温裾淒絕故鄉思君羹未

逮難為子王事多艱尙待誰奉檄登車羨毛義揮毫裁錦

感邛遲客中對客增惆悵始信勳名貴及時

蘧蘧蝶夢百花中花色迷離日色愍心跡幾人光汗簡聲

華大抵逐飛蓬一襟化盡塵兼土萬卷藏來治與弓家學

如君純世業固應儀羽效達鴻

藥榜才名綺歲傳春明簪聚又頻年鞠通瘦處官同冷脈

望肥時骨自仙駟馬高車羞俗志稽山鏡水締清緣一行

新令仍依舊君曾以大挑令直贏得風流訪樂天

萬家佛像宰官身膏澤勤宣尺柄伸面目不妨安下士心
期惟願作良臣况當青犢蹂傷處都是紅羊劫後人勞來
安全非異政琴堂鎮日與民親
馮唐感切子安文鏡髮催人有幾分郎署回翔追往日滄
桑變幻慨浮雲我懷愁似張平子公望香如荀令君此去
無須多繾綣好敦風俗慰

宸厪

屈指河陽復舊觀天教枳棘暫棲鸞潘輿且喜輕千里陶
菊原非博一官日愛三冬循吏譜粗饒百斗腐儒餐相知
更有蘆溝月照洽人間竹馬歡

同邑 郭賡平 子鈞

騷壇巨手擅探驪合寄西清研祕思竟奪鳳池堪惜汝便
除騶令更輸誰畿垣聽鼓趨星早芹嶺鳴琴坐月遲卻好
離筵光照眼石榴花艷正開時

稽山鏡水數南中怪得飛鳧去太多名宦風流餘笠屐男
兒事業在桑蓬庭閒草任生長砌地隙花多種幾弓早晚
續脩諸傳譜免教肅肅賦哀鴻

郎官出宰已爭傳况奉高堂樂引年幽酒春濃歡介壽潘
輿花簇擁行仙作忠移孝多新澤如子愛民丁夙緣我媿
雙親虛祿養報暉心切望南天

當場仍現宰官身提唱風騷士氣伸拔薤豈徒懲勢族征
茅還望貢王臣龔黃飾治惟經術蘇白能文信雅人下邑
絃歌增道化西湖魚鳥亦相親

年來樽酒快論文握手河梁未忍分笑寄人間同弱水喜
看天上現慈雲日兼冬夏稱循吏年富春秋仰

聖君莫說杭州拋不得政成入覲慰

宸厪

千里湖山取次觀鞭絲得得控虬鸞金臺豈弗留賢士浙
水從來揀好官幸識仁徵魚輒舍應餘清俸鶴分餐他年
儻假嚴灘道穩聽謳歌愜素歡

南皮

張之洞

香濤

現官

舊是郎官宿權爲枳棘棲荒城猶舉确春隴始耒犁皂蓋
鞭笞靜青山笠屐攜懸知詩筆好題徧浙江西

宋賢多乞郡今見

聖恩宏爭壯登車語兼歡捧檄情曹司蠆蝨衆史職馬牛輕家
國都何補輸君有政聲

安邛

李端遇

小研

侍郎

最怕他鄉聽唱驪未分手已動離思同科交誼原難別並
世詩名更溯誰吾輩相逢今雨舊公行翻似出山遲仁風
吹向杭州路努力清脩答

聖時

光陰屈指十年中此日彈冠太遽匆報

國如君思建樹浮家似我感飄蓬相看喜色憐毛義敢學高名蹈仲弓已溺已飢多少事嗷嗷中澤有哀鴻

江右文章日下傳一行作吏及中年榮辭

北闕因能養宦到西湖卽是仙自昔白蘇留美蹟於今山水得

奇緣知君不爲遊觀計曾祝心香懍告天

長安同是宦遊身尊酒傾譚快引伸每說教民先牧令可

知循吏半名臣才非百里追前哲美比雙清有故人邢升菴同

年亦銓四莫怪交深常惜別無多相聚倍相親

川鹽亭

久主司農會計文偶緣乞外宦情分燕臺白戰曾吟雪越國蒼生早望雲清到一心盟夙夜感應萬口頌神君蚩蚩此後多攸賴周召風徽片念塵

功名黑髮壯人觀勝我華顛對鏡鸞宰肉陳平天下士折腰元亮

聖朝官方愁別緒紛難理况讀新詩秀可餐記取他年膺上考
春明同話故情歡

同邑

辛孚德

懋齋

本是司農領簿人花封出宰爲迎親訟庭草茂椿萱蔭菱舍棠甘雨露新自古郎官符列宿從來孝子卽忠臣遙知

浙水承恩處父老歡騰得寇恂

十年簪盍聚春明忽唱陽關感別情
蛩駟因依徒切我雲龍追逐最思卿
更爲後會知何日欲勵前修已半生
尙乞故人匡不逮箴規時惠勉忠貞

豐城

毛良貞

峩眉廿載訪香熏冠劍新聯太華雲
毛檄有人同梗概袁山清望况桑粉
駸駸南去羣空北燕燕于飛集便分
浙舫潘輿誰仿得承歡綵服更紅裙

壬申三月良貞循例北上識湯紹卿
先生於同鄉客坐繼續之官開化六
律知十年前畿垣需次重到司農銓

除縱得瘠區已文章之吐氣矣浙中
蒼赤臚列造福有基他日政成民樂
合億萬歡心以祝庭闈福壽雖他州
借寇而使君仍句留大半豈非佳話
天末聞之定當舞蹈也

鄉小弟毛良貞呈稟并識

俞士彥

德甫

飄然烏帽控青驪折柳河陽繫遠思
忽訝山濤甘作吏自慚王粲欲依誰
風塵白首期相久霖雨蒼生慰未遲
此去兒童迎竹馬公何來暮太平時

十載相隨計簿中無端行色又匆匆
要知民病須求艾莫惜離蹤似轉蓬
故里兵戈憐一炬田園松菊賸三弓
定看

棠蔭能兼庇社燕殷勤戀塞鴻

羨君藥榜早名傳捧檄今朝勝昔年不學陶潛耽隱逸本
來梅福是神仙盤桓樽酒留春夢管領湖山證夙緣兩地
賡詩勞驛使莫因南北各分天

翩翩復現宰官身腰折何妨待蠖伸秋水一方懷故國春
風百里寄王臣劇憐橐筆仍羈我卻喜鳴琴已得人清獻
讀書林不遠江天鷗鳥許相親

北山何事漫移文出處賢良品迥分萬古大觀推浙水一
天征思動燕雲低頭伏櫪無知己強項登場獨讓君翻笑
割雞成小用瘡痍撫字費心厓

報最循聲上國觀何妨枳棘暫棲鸞豈因家計謀千石聊
慰親心辦一官櫻筍祇應供祖餞尊鱸此去儘君餐孔公
慣醉非無意記取春明不盡歡

宜春
易光蓉
寶齋

燕雲千里控騶驪回首觚棱劇有思美錦需才仍屈子明
珠作字欲貽誰別逢舊友腸彌熱行到陽春腳肯遲莫恥
邯鄲嫁厮養蛾眉多少未逢時

記得看花

禁苑中鞭絲帽影笑恩恩曲江宮錦香熏杏弱水神山遠隔

蓬負著作才惜未與館選毀齒早推千里馬鄉捷年才十六中眉親挽六鈞

弓此才肯爲蒼生出撫字勞心莫澤鴻

錦囊佳句小奚傳記取琴鳴出宰年一試牛刀煩令尹雙

飛鳧寫作神仙星迴北斗光曾近客與西湖舊有緣公車過浙

擬爲西湖之遊衣袖鑪香消未得六橋煙柳憶諸天

男兒報

國此微身尺水潛鱗屈亦伸技擅屠龍今小試化行馴雉古

名臣循聲豈讓稱三異餘事猶堪了十人艷說道旁迎竹

馬子來情是一家親

金鍼細度喜論文可奈臨歧手欲分君精於文律擬以掛窗課質正未果

席遙觀滄海月爲霖穩作泰山雲龍門悵望偏憐我燕市

悲歌又別君預祝喬遷消息好雙魚早慰故人厓

浙西山水信奇觀枳棘何妨集鳳鸞折柳縈懷名士酒求

芻係念牧民官循良幾輩榮青史溫飽平生鄙素餐好種

河陽花滿縣板輿雙奉錦衣歡

安福劉澧 蓮舫

黃鸝交囀

上林枝欲別依依兩繫思此去湖山欣得主平生肝膽爲酬

誰鳥因求友遷喬早雲許爲霖出岫遲若肯折腰貪五斗

十年前是種花時

文字知交兩載中驪歌一唱太怱怱浙中望澤遙迎馬冀

北驅車緩轉蓬談論縱橫星動劍吟懷洒落月如弓與君
共約今宵醉此後佳音盼遠鴻

料應德政口碑傳績懋龔黃似昔年撫字心多真父母清
廉俸少卽神仙雙鳧變幻非無意獨鶴追隨亦有緣報最
循良登上考眼前赤子喚青天

憂樂相關繫此身蒼生霖雨志初伸不爲庸吏卽循吏何
必遠臣殊近臣風月從新增勝境湖山依舊屬詩人公餘
堪展循陔願百姓謳吟慰老親

官箴自昔有明文盡一分心效一分到處黍禾望膏雨等
閒富貴總浮雲文章幾輩能傳世經濟如公可報

君莫歎蓬萊今小謫親民從此更憂厘

百里經綸儘可觀郎官出宰羨翔鸞祇應從政銘三字豈
爲憂貧辦一官早卜仁民能覆被還勞念我勸加餐他時
遷秩重來覲杯酒情聯十日歡

萍薺

文星昭

亮卿

月旦論知己如君有幾人文章真博雅風骨自嶙峋小就
非貪祿高堂欲慰親武林從此去好作萬家春

安福

歐陽銜

冰臣

舊雨相逢又別離人生泥爪那堪思循陔爲養情猶我出
岫無心識者誰欲報春暉常耿耿敢貪厚祿故遲遲行程

珍重安輿穩孺慕依然襁抱時

簪盞襟題十載中忽聞驪唱覺匆匆飛觴劇醉長安月破浪如飄大海蓬可嘆此才非百里還欣有米勝雙弓故人官是南州尉側耳循聲附遠鴻

慧心況復藉家傳曾賦高軒少小年琴鶴自來非俗吏湖山今始屬詩仙行來松嶺留餘蔭咏到梅花證夙緣他日杭州君細說安排好景水如天

當場早現宰官身小試從今志始伸業課農桑登上考心厓撫字卽良臣還來珠好因廉吏得此弓原是楚人花落訟庭無個事祇將忠孝報

君親

示我新篇絕妙文一心憂樂已平分恩膏急似崇朝雨富貴輕於過眼雲痛癢此時原在抱昇平何術可匡

君滿腔熱血酬知遇猶念

宸衷盱食厓

銓曹笑我政徒觀爲博

天書捧彩鸞差喜杖扶依老母豈因匏繫戀微官馳驅勉效輪丹悃進退恆虞誚素餐株守自憐甘旨缺何如五斗切承

歡

理化 張道淵 秋生

珠穿好語比探驪讀罷詩篇繫我思志士勵行惟守已達

人安命更憑誰軼羣騏驥馳聲早希世璠璣得價遲丙午

科至癸亥來暮聞歌欣捧檄愜心勝似昔年時壬戌大

湖山此去稱遊觀奚止庭前舞彩鸞治譜待傳三異政農

司回憶十年官知君伴鶴多清節愧我懸鶉誚素餐更羨

高堂春正永鼎鐘隆養好承歡

萍鄉 喻增偉 叔芸

在門傾耳聽歌驪風雨頻增遠道思投以木桃休靳我採

來芳草更貽誰春原有脚傳郵速雲豈無心出岫遲小試

種花新手段料應多是桂香時

十年蹀躞輓紅中駒隙光陰太覺恩空有雄心嗟伏櫪徒

存短髮笑飛蓬官閒雅稱人磨墨境仄難將地拓弓更惜

朋簪寥落甚羽儀應羨漸達鴻

天上麒麟美譽傳雲程躡足憶髫年姓名久已標千佛骨

相奇應抱九仙揮手忽辭郎署職現身重結宰官緣草生

花落公庭靜不羨清華蔭木天

佳山水處寄吟身况復囊琴雅意伸密令何嫌爲小宰潞

公終列入名臣政期生我非腹我頌愜風人更兩人第一

治平無異術親民要在與民親

寓齋時與細論文談笑渾忘靜夜分共矢清操盟白水不

將健翮羨青雲一官日下閒憐我百里雷封遠憶君最是
屋梁殘月滿江東渭北意常厓

內外遷移頓改觀飛鳧翻覺勝翔鸞名山心事千秋業長
合頭銜六品官屈爲養親聊捧檄勤知聽政每傳餐九遷
看取榮加秩鹿轂喧騰夾道歡

同邑

辛景舒

成軒

忽聽陽關唱駕驪臨歧送別繫深思湖山有幸公爲宰風
雨多情我溯誰循吏功名傳誦易賢良父老嘆來遲十年
農部勤觀政霖雨蒼生正及時

記我追隨兩載中如梭歲月太恩恩雕鏤枉費非良木聚
散難知感斷蓬遠道相思酬錦字他年入
覲錫彤弓天南地北音塵隔倚遍闌干盼塞鴻

循良有自口碑傳四野桑麻待澤年棠舍留陰期後日琴
堂譜化續前緣詩流雅韻鶯難和官到清貧鶴亦仙最是
逢迎皆竹馬愛民心事本如天

天半浮雲寄此身螭龍乘雨屈能伸朝端舊領農曹籍浙
右今爲牧令臣官職詩名都動我文章政事本兼人杏花
村裏勸耕處召杜循聲父母親

賢良本不在虛文有一分恩感十分膏澤下民甘似雨慈
祥在抱覆如雲化行南國逢

當代歸去西湖憶此君聞道瘡痍猶未復策名從此最心塵
第一江山本壯觀桐花竹實好棲鸞牧民念切能除莠愛
士情殷不及餐喜動毛生知孝子貧驅陶令作微官功名
富貴渾閒事薄宦聊爲祿養歡

會稽任官燮意芳

桂子香中到使車聞君才望重京華苦辭樞要三清地來
活瘡痍百姓家山繞訟庭秋色老簷垂清晝夕陽斜平生
經濟纔舒展守潔冰壺向友誇
年少科名春夢婆官途蹤跡儘銷磨掉頭京國征衫瘁執
手朋僚別詠多畢竟才人非俗吏早商瘠土予恩波出山

仍似山中水羣識盟心志不他

昔荷盤餐冷落時關門令尹喜吾師待成知己惺惺惜爭
奈勞人草草離參去商來心有恨蓬飄萍合理難知他年
重到甘棠下好聽行人口似碑

張學翰森甫

艷傳年少已探驪竹馬迎來慰遠思績奏司農聊復爾政
稱循吏又輸誰新裝琴鶴攜行便舊迹泥鴻話別遲計日

後君剛半月桂花香又菊黃時

君以桂秋泄新余重九後始抵開

書劍從軍百戰中光陰鏡裏去恩恩

壬戌迄丙寅從戎大江南

日靜休鳴鼓甲帳宵沈盡挂弓再造湖山聞奏凱謀生筆

墨嘆飛蓬欣逢是處棠陰好側聽循良慰澤鴻

車聲碌碌厭呼傳回首春明又幾年往客京華數載九塞風烟愁

逆旅五雲樓閣別神仙時在青殿從學朱閣部勞身久悞輪蹄鐵結

習常慳翰墨緣賸有一官甘冷落掛帆來趁菊花天

前生合是謫仙身粉署清華守職臣曉拜緋魚辭絳闕秋

催鞍馬踏黃塵一船書畫烟中月百里湖山鏡裏人料得

記程詩思好筆牀茶竈鎮相親

闌干苜蓿屬斯文薄宦蕭條俸許分繞郭溪光生晚霽對

衙山色落浮雲蘆溝曉月催行客芹嶺仁風待使君終是

讀書能有用清時物望

聖心塵

除書纔下駕飛鸞鏡澈冰壺許共觀原唱有出山仍暫領

頭銜辭舊侶藉開眼界結新歡貽曾詩柬親名士有送別任學博

之饋乏盤餐媿冷官底是聯牀成久別西風明月夢長安

家兄供職宗學客京三載

德興 李燦白 亦仙

應手明珠獨得驪髻齡傑出匪夷思蠅飛附驥真慚我予

丙午副車同榜鯉化登龍更在誰同輩少年多不賤逢君今日卻

嫌遲琴堂細領雍容致猶是洪都聚首時

為憶春風得意中百花看徧馬恩恩聲增十倍猶登李會

集羣仙宛在蓬珥筆頻年趨畫省彈丸底事屈良弓生平
抱願行將展料有知音識鵠鴻

故人飛鳥聽輿傳憶別芝顏廿七年伏櫪駑駘應就老棲
塵雞犬那能仙聊隨百里叨清蔭也是三生締夙緣難得

下交忘勢分淵然秋水見長天

予以客居開
得時拜謁

宰吏隨緣現此身長材畢竟蠖能伸十年郎署清華職萬
里

君門草莽臣馬齒頻加徒感我牛刀甫試不猶人儒生多半寒
窗守那得名場顯二親

敢希樽酒細論文一領新詩拙自分筆吐光芒高日月毫

揮錯落化烟雲恩膏浹洽期霑物緒論纏綿切報
君意不盡言衷若揭蒼生托命此慈塵

採風問俗就民觀四野忻聞噦噦鸞子惠推仁稱衆母辰
謨述職勉同官一麾願叶鶯遷兆五斗差供鶴俸餐側聽
絃歌開化導遠人託宇也顏歡

同治甲戌九月自開化任旋里諸人士各贈章錄存

開化
魏清榮

撫字芹陽僅一年恩周下邑口碑傳桃花遍蔭三春景禾
稼勤歌七月篇有意肥民憂瘠土常懷潔已戒貪泉如何
便唱驪駒曲霜滿楓橋月滿川

萬民父母不虛稱害既嚴除利亦興政簡刑清昭悃福官
廉吏瘦頌賢能勸奸正爲良民勸闢佛都緣匪類懲學道
愛人真不負好誇心似玉壺冰

新栽桃李望成陰沃葉培根繫念深浙水文人爭識面燕
山才子早傾心因時成物春風意把酒論交舊雨忱從此
廣陵留雅調人間重聽伯牙琴

大雅扶輪愜素心攀留無計恨難禁錦江重見文星聚銑
水還期宦轍臨恩比棠陰南國愛蔭滋萱草北堂深清風
兩袖蕭然去贏得芳名頌古今

開化 張立準

憶承

簡命出

楓宸天惠文星福我民薇省舊爲香案吏芹陽今見宰官身
恩周芾蔽先平訟化洽菁莪首作人忽聽鯉庭悲棄養難
留有腳是陽春

爭傳賢宰涖開陽攜得琴書卽宦囊政化青蚨先杜弊嚴禁
私錢爲民除害忱盟白水早焚香公有告神衡文士託公門李戴

德民懷召舍棠鸞鳳豈終棲枳棘偶留爪印便高翔

欣霑化雨甫經年勝坐春風侍講筵棘院量才推玉尺癸酉

秋公調入浙闈分校天香設席挽名賢時留課士愁聞驪唱催程日

難繫鳧飛欲去仙願附劉安雞犬後徧隨章水執吟鞭

知公綺歲擅名流未冠先探月桂秋青瑣班纔聯日下觀風

告示有翱翔青瑣朝花封宰又出山陬莼鱸有興饒歸轡

琴鶴無情促去舟桃李滿城殷待澤攀轅同乞使君留

開化 詹光墉

袁山鬱秀光康樂鍾靈氣代有絕異人蔚然成國瑞惟我

慈惠師尤為拔其萃總也負英多文章已驚世作賦獻

彤廷士林瞻偉器

簡命宰芹陽芹陽荒僻地秉性昭真誠持躬率坦易膏澤下斯

民經術飾吏治悠悠兩載中教化邇遐被客歲訃居憂吾

輩皆含淚無術可留轆爰殷求訓誨絳帷繞天香雅人自

深致每見有佳章賞奇不忍置甲乙登棗梨拳拳示鼓勵

因之銘感深頌聲當勿替此恩仰報難永勒在碑誌臨別

意怍怍何時得重聚遙望大江西隨風生企慕明年桃李

時願公還復至

又集古

夫子昭情素謝靈運悠悠迥且深陸士衡徘徊蓬池上阮嗣宗萬

象涵古今蘇軾海內文章伯孫逖欣逢傳說霖蘇軾洪鈞陶萬類

張茂先願言懷所深陸士衡清機發妙理曹顏遠清風吹我襟阮嗣宗

宗李揮手自茲去錢嘆息分枝禽王相送還成泣維秋懷鳥

伴吟

蘇軾

明日隔山岳

杜甫

天高欲橫參

蘇軾

開化詹峻

眼前赤子視猶民痛癢相關撫育親澤溥藝林隆造士歡
騰垌野頌如神冰心鐵面師前輩甘雨和風繫此身翹首
豫章森大樹高臺分蔭共熙春

牆高許我及門遊知己恩深媿未酬幾日公將歸故里七

鄉人願識荊州

七鄉士人未見公者多來求見

簿書執掌纔周載講席勞

心僅一秋莫謂金溪長逝水有情都作淚波流

不待官箴守四知自然義利析毫絲風聲遠播爭傳耳月

旦公評豈相皮正好歡騰芄樸詠無端廢讀蓼莪詩春暉

長向萱庭照孟荀重嘗釋遠悲

官如傳舍送年年此去攀轅欲怨天劍履無多稱韻絕琴

書未典免迤邐交惟有道文章重官到懷清況味憐自愧

囊空無別贈兒曹齊赴送劉錢

贈言欵欵復深深滿紙珠璣不厭吟花好宜開連理樹

尙未

得公

棠甘恐作兩家陰西山景駐添黃髮

太宜人在籍侍養

北闕恩長表赤心桃李新栽叨雨露可能結實報佳音

魂銷南浦悵依依唱罷陽關手緩揮落日片帆離我遠清

風兩袖送公歸郵亭寂寞丹楓老章水荒寒白雁飛倘有

奇緣重問字願親講握復摠衣

開化 魏葆珍

枳棘非棲鳳芹陽詎久羈歸懷難盡訴別緒不勝悲德化
銘心版仁恩載口碑桑麻勞長養桃李沐扶持雀角懲澆
俗羔羊仰令儀好官猶衆母仙吏卽名師少住天香院多
承化雨時琴書敦夙好杖履樂追隨纔得瞻黃菊何期解
絳帷執經猶是我問字更依誰愁聽驪歌唱攀轅驛路歧
何年重仰止晤對話新詩

開化 徐國光

極想攀轅計已窮遙吟俚句媿難工才隨高下兼收我學
果深純僅見公澤被士林膏火渥興起書院
籌置膏火恩霑商旅水

程通

柯道木商向苦索
詐爲禁絕積弊

芹陽月旦今評止到處驪歌別恨

同

使君政教得民心作別舟裝鶴與琴兩岸攀留牽柳色一
城鼓舞愛棠陰返歸梓里啣哀切回憶書堂沐化深翹首
慈雲祈再到芹陽黎庶待甘霖

開化 詹汝郊

自從膏雨惠斯民

壬申七月旱甚公初抵任
初七得雨初八九大沛

挾髓淪肌一

體親堂上勸人供活佛

禁三清
山進香

壇前抗疏質明神

有謁城
隍神牒

居官才大初行志將母情殷竟乞身草木都知深雨露
望公返旆再回春

為養雙親作宦遊恩叨升斗寸心酬琴堂未奏三年績花
縣咸尊百里侯準擬青雲能得路忽逢白露竟悲秋七鄉

簇擁難為別開原石門龍山金水玉田雲臺崇化七鄉空見念溪水碧流

懷清自矢畏人知案牘勞形斬亂絲公明而能斷案無留牘遠近傳頌申

理冤情羊有舌革除苛政虎無皮門丁吏役約束嚴明他年應紀

御屏績此日喜添吟閣詩到處桑麻風俗好荳花棚下口傳碑

心厓利濟甫經年豈料帡幪失二天書著汗牛真富貴命

臨磨蝎竟迺適蕉桐韻聽深蒙賞萸柳姿柔倍可憐好仿

清風劉太守從今始選一文錢

歡騰廣厦庇人深多士紛紛伏案吟籌置書院膏火釐定章程今日甄別開課

小草無知皆向日甘棠可愛盡成陰文章結生福雲

樹榮懷兩地心他日兒童迎竹馬歌依餘音

纔睹雲開得所依無端驪唱淚交揮攀轅意切公重返扶

杖顏開客早歸路入鄱湖雙槩穩夢回銑水百花飛板輿

再奉慈闈到笑着斑衣當錦衣開化郭寶城介卿

福星纔得照偏陬爭奈恩恩未肯留政本一心恩自浹才

非百里德兼優琴鳴玉案絃揮手鐸振山石點頭竹馬

他年迎道左未知生佛再來不

至開化謁紹卿夫子詩以誌別遂安童遵本

斯文墜緒振芹陽
羸骨與歌藹道旁
立雪有緣欣御李
登雲無分媿逢楊
三秋風雨栽培厚
千里湖山別夢長
顧此微軀自珍重
要酬知己在文章

紹卿夫子以外艱卸任開士紳留權主講書院今秋

回籍敬步都門留別原韻奉寄

童遵本

遙想衢歌盡唱驪
誼關師弟倍相思
殷殷設榻曾留我
落落知音更屬誰
附驥無緣深自媿
登龍有幸未嫌遲
不堪回首天香院
樽酒論文夜半時

七戰春闈轉瞬中
郎官出宰又怱怱

馬子科第官

況翻同渡梗蓬琴
鶴一船書四壁雲
烟半榻地三君

送別

溫州府 國子監